



**Guete Abe u härzlech willkomme.
I freue mi Euch mini Biuder s'zeige.**

**I tue nech jetz de vielech grad irritiere. Aber i gloube es
chunt scho guet.**

**Vor es paarne Jahr ha i bim ne Wäutrekordversuech e
Fotograf leere kenne.**

**Dä Ma het a däm Abe wunderbari Bilder vom ne
Stärnebiud gmacht wo mit 32000 handgossni Kerze
erlüchtet worde si.**

Dä wo die gmacht het, isch dr Rodo Wyss.

Är het mi beeindruckt u sini Bilder hei mi fasziert.

**Es isch nüm lang gange, hani säuber mi erschti
Fotokamera kouft.**

**Wär dä Rodo Wyss würklich isch, ha i denn aber no nid
gwüsst.**


**Ersch wo i ire Ustellig im Historische Museum z'Bärn
Bilder vom Rodo gseh ha.**

Burgäschisee im Morgennebel

Während der Einleitung stehen lassen, bis der Text fertig ist.



**Eis vo de Lieder vor Theres u vor Caroline het mi a Mani Matter erinneret.
I bi scho ir Schuelzit em Mani Matter i Form vo sine Lieder begägnat.
Aber i bi em Mani o no angers begägnat. I ha vili Jahr wisavie vom aute Spital z Herzogebuchsi gwohnt.
Genau da wo der Mani gebore worde isch
U so ischs nid erstunlech, dass mini Emotione wo Theres u Caroline hei agfange spile u sofort bi dene Bilder vo Mani Matters Isebahn si gsi....**



U „Ir Isebahn“ isch eini vo mine erste Kassette gsi. Was i aber nid gwüssst ha, bis i di Ustelig z’Bärn ha gseh, dass di Bilder vom Rodo si.

I freue mi sehr, Rodo, dass Du hüte em Abe der Wäg dahäre gfunge hesch.

Viele Dank, Rodo.

Er Houptprob hei mir drü diskutiert, ob i das Biud wot zeige.

Zersch heimers verworfe, mit der Zyt heimer gmerkt, dass vielleicht ganau die Lieder vom Mani Matter für üs nid nume em Afang si gsi, sondern o Heimat – e musikalische Heimat!

U so si mer scho z’Bärn, wo i z’erschte mau mit em Stadtläbe bi i Kontakt cho. Dört starte mir zum erschte Block, e chlini Reis mit Morgebilder. Vo Bärn fahre mer nach Solothurn, e churze Abstächer a Rhifau u über d’Insel Elba a Burgäschisee

Im zwöite Block gits no angerei Afäng sgse. U mini persönleche Highlights, wo nüt mit Afang z’tüe hei oder vielleicht äbe doch.



We me ire Stadt isch, de chumt me nid säute zum ne Bahnhof.

**E bsungere Platz mit viune Mönsche,
Mönsche wo hie achtlos düre loufe,
Mönsche wo hie Gäud verdiene,
angeri wo hie Gäud usgä
Säute a settigi wo hie Gäud bättle,
Heimatlosi wo hie jedi Nacht übernachte u im Läbe
widerwiug ihre Heimat da gfunge hei.
Mönsche wo hie uf ene Reis starte
U mänge Mönsch het o hie sis Härz verschänkt....**

Am Morge em Sächsi im Bahnhof Bärn, genau 05:59:43 Sekunde.

E einzige Ma steit am ne Tischli mits im Biud wo sis Kafitassli zu sim Mu füehrt...U öpper fahrt uf dr Routräppen.

U was chöit dir no i däm Bild entdecke?

Bahnhof-Treffpunkt

Kurz stehen lassen



**Es paar Schritt witer, bir Heiligeischtchiuche, isch no
weniger los.**

E Ghüdersack isch no nid abghout...

Hie het dr Tag no nid emau agfange....

Spitalgasse Bern

Kurz stehen lassen



We me sich um 180° drähit, isch doch scho einiges meh los...

Es Tram blinkt für dä Wäg znäh, wo scho vorgäh isch,
Lüt a Bahnhof bringt u hout, wo wei irgendwohäre ga.

Tram-Bahnhof

Kurz stehen lassen



Einen Moment das Bild betrachten lassen

**Das Biud hani wöue em Stadtpräsi schicke.
I has du la si.**

**Wahrschinlech cha är ja o nid viu mache, we d'Ample
scho em Morge aui Farbe zeige.**

**U wi fat Eue Tag a? Bi rot, orange oder grün,
weles isch Eues Liecht füre Start i Tag?**

Di Ample spinnt

Kurz stehen lassen



U geit me es paar Schritt witer d'Stadt zdür ab, chame scho erahne, dass der Tag für di eine oder angere agfange het.

E Laschtwage vor emne Lade wird abglade, für das de d'Lüt chöi ga ihri Gipeli u Läbesmittu choufe u aus da isch bis zum nächste Tag.

Ja, da het der Tag scho agfange.

Nume gseht mes nid so...

Marktgasse Bern

Kurz stehen lassen



U scho gseht mes guet, dr Tag wird cho, unufhautsam.

**U em Himu i de Wulche si d Farbe scho rot, wüu dr Fön
scho lang –vorem Morge – agfange blase het.**

**U so isch immer öppis am Afa. I jedem Augeblick, i
jedem Momänt...!**

Morgenrot


Kurz stehen lassen



**U we d'Sunne so langsam ufgeit, het scho für mänge dr
Tag agfange u isch am schaffe.
U wo di erschte Sunnestrahle i d'Kamera lüchte, han i o
der Stoub uf dr éinse gseh, u i hami afa eregre, dass i se
em Abe nid suber gnue putzt ha.**

Erste Sonnenstrahlen über Bern

Kurz stehen lassen



**Ig stah hier uf der Chornhusbrügg
Das isch die wo mer hie im Schatte gseht..**

Vielech chöit Dir mi da druffe igendwo finge.

Bärner Brügge 1

Kurz stehen lassen



**O we nid aui Bilder so chöme, wisi planet si, chöisi doch
spezieu si, wi das hie.**

**E jede Zug, wo richtig Oschte fahrt, fahrt hie über
d'Aare.**

**Usser die wo nach Worb u natürlech o nach Solothurn
fahre.**

**U so nämer haut es Zügli nach Solothurn u fö am ne
angere Morge am Bahnhof in Solothurn a.**

Bärner Brügge 2

Kurz stehen lassen



**Wär het der Bahnhof in Solothurn am Morge scho
einisch e so gseh?
Im Gägesatz zu Bärn, iladend, charmant und fründlich.**

Bahnhof Solothurn

Kurz stehen lassen



Moses Brunne in Solothurn

Kurz stehen lassen

**Es isch immer no em gliche Morge.
Der Mosesbrunne bir St.Urse-Kathedrale isch punktuell
vor ufgehende rote Sunne belüchtet.
Lüt wo Solothurn kenne, würde jetzt säge, dass was i da
verzeui sig nid wahr
D'Sunne göngi hinger dr Chile uf.
Ja, das stimmt.
D'Sunne ufem Brunne isch e Refelktion vom ne
Fänschter im Von Roll Huus.**



**O hie trifft d'Sunne langsam i, u dringt i die teufe
Hüserschluchte vor Solothurner Autstadt.**

Schmiedegasse Solothurn

Kurz stehen lassen



**Spinnwäge grad am Afang vo dere Gass... oder am Endi?
Höch obe ire Strasselampe isch e ideale Ort für Spinne. I
dr Nacht het si sicher gnue Mügge u Flöige.**

Noe m 3. Advent isch das Netz no dert gsi.

Spinnenetz

Kurz stehen lassen



E Postchartegruess vo Solothurn

Sonnenaufgang bei der Rötiibrücke

Kurz stehen lassen



**D'Velobrügg vo Zuchu.
Em ne angere Morge, churz nach Sunneufgang.
Spiegelig si immer öppis bsungers.**

Velobrücke Zuchwil

Kurz stehen lassen



**Uf däre Brügg mit Blick gäge Solothurn.
E wunderschöni Spiegelig mit em neue Synthesgebäude
wo sich unuffäug i d'Hüserreihe integriert.**

**Es git ganz säute Momänte, dass der Voumond no churz
vorem Tagesabruoch z'gseh isch.
I ha weni Bilder mit Voumond.
Aber so eis hani letschte März in Schaffhuse chönne
mache.**

An der Aare bei Solothurn

Kurz stehen lassen



**Der gröscht Wasserfau in Europa, mau bi Vomond u
ohne Touris vom ne ungwohnte Winku.
Dank ere Strasselampe u weni Wasser, isch die
Belüchtig so spezieu.**

**So, hie springt s'Wasser u landet wit unger. U i springe
no bevor mir wider i d Heimat chöme, abe i Süde.**

Rheinfall

Kurz stehen lassen



E morge letschte Herbscht uf dr Insel Elba.

**Wär würd da nid gärne härhocke u dr Tagesafang
gniesse.**

Stühle am Strand

Kurz stehen lassen



**Träume unger Paume!
U was geit Euch bi däm Biud düre Chopf?**

Palmen


Kurz stehen lassen



**Es isch e Blick ine Wald uf dr Insel Elba.
Ha dass aui Linie wo uf dä Punkt füere,
ersch bi gnauer Asicht gseh.**

Gemälde (Elba)

Kurz stehen lassen



Wär scho mau uf Elba isch gsi, weiss dass es dert meterhöchs Schiuf het. U so chame o dert settigi Gägeliechtufnahme mache.

Aber wär jetz gloubt, dass das Bild uf Elba entstange isch, dä irrt sich.

Es isch e Schiufvorhang am ne See hie ir nöchi, churz nach Sunneufgang.

U wär cha hingerdra luege, gseht, dass es no es Tierli het, wo sech da zeigt. Aber was? Es Änteli oder e Fisch wo gsprunge isch.

Schilfvorhang

Kurz stehen lassen



**Weme dä Vorhang chli zieht, gseht me no chli Näbu, wo
däm Momänt e bsungeri Stimmig gäh.**

**Es het scho angeri Künschtler gäh, wo die spezieui
Stimmig rund ume Burgäschisee gschetzt hei. So het der
Kuno Amiet sis Atelier in Hellsau gha. Es Dörflii nid wit
vom See. U Hellsau het ja der Ursprung bir „Helle Aue“!**

Stäg 1

Kurz stehen lassen



**U wemer der Vorhang uf die linki u rächti Site zoge hei,
isch i der Mitti Bühni.
Genau wi hie dr Stäg uf em Burgäschisee. E Bühni, wo
jede Momänt s'Läbe cha losgah.
Uf dere Bühni si jetz Gitarre u Gige parat für Caroline u
Therese.
Si spilenech jetz witeri wunderbari Lieder.**

Stäg 2

Kurz stehen lassen

Zweiter Block

	<p>Wüsset Dir was das isch, wo hie us där Store useluegt?</p> <p>U was isch hie dr Afang?</p> <p>Dä gspässig Spitz? Oder das was derhinger isch?</p>
Pfeilspitze	
Kurz stehen lassen	



**Das isch e Pfiu, wo näbe sim Ziel düre isch
Dür s Fänschter u dür d'Store.
U steuet euch jetz vor, was hie aus agfange het.
E Fluech vom ne Bogeschütz
Es Telefon für ne Reparatur
Unes Versicherigsformular wo öpe so chönt afa:

Liebe Mobiliar, obwohl ich mir alle Mühe gab, traf der
Pfeil die falsche Scheibe.**

Pfeil


Kurz stehen lassen



**Hoppla, das Foti darf i nid zeige.
Auso nämers wider wäg**

Bogenschützin

Kurz stehen lassen



**Da Bild wär spannend gsi s'gseh wo dä Schuss het si
Afang gno.**
**Aber wo mir Partnere gseh het, dass i das wot zeige,
het's Gstürm agfang.**
**Si wöugi, das i das Biud nid zeige, Si heig nid söfu näbe
d' Schibe gschosse.**
**Wenn, de müessi i vorhär säge, dass sie dä Schade nid
verursacht heig.**
Auso wüsst Dir's jetz u i darf das Biud Euch zeige.

Pfeil	
Kurz stehen lassen	



**Das isch d'Esther, mi Partnere. Mis einzige Porträt.
Danke Esthi, dass i vo Dir das Biud ha chönne mache.
Das Biud isch e Abschuss mit em ne Hightech- Pfileboge.
Dä Momänt isch wou dr wichtigscht vom ne
Bogeschuss. Hie em Afang entscheidet sich, ob dr
Schuss i di rächti Schibe geit.**

**Bi so mne Schuss muess aues stimme.
O fürnes Foto.
U hie hets gstumme.
D'Schützin isch no vou konzentriert, luegt is Ziel.
D'Sehne entspannt sich u dr Pfiu wird use katapultiert.
U was mi o fasziniert a däm Biud, isch dass me no gseht,
dass di gspannti Sehne i ihrer Backe het Abdruck
hingerlah.**

Bogenschützin

Kurz stehen lassen



A angeri Art vo Pfiu u Boge hei mir em Tunelportal am Önzbärg.

**Da donnere d'Züg mit 200 km/h dür die Tunnle düre.
Die Triologie wo i euch zeige, isch innerhaub vo 6-7s
entstange.**

**Hie chunt e Zug usem Tunu use.
Aui Blätter u Pflanze si stiu u ruhig. Mi gseht no düre
Zug düre, wüu aus so schnäu geit.**

Oenzberg 1

Kurz stehen lassen



Hie chunt e zwöite Zug entgäge. Dr hinger gseht me no s'Dach vom erschte.

Jetz gseht me nüm dür d'Züg. Stattdesse gseht me i de Fänschter vom Zug s'Gländer mässerscharf gspieglet.

Dr Struch im Vordergund isch scho uscharf, bewegt vom Fahrwind vo de Züg.

Oenzberg2

Kurz stehen lassen




**U das si o scho d'Schlussliechter vom zwöite Zug.
Offesichtlech isch dä dr chürzer gsi, oder er isch no viu
schneuer düre Tunu gflizt aus dr erscht.
Pflanze u Strücher si no weniger scharf. Es git no meh
Wind.**

**Di Triologie het für mi es spezieue Bedütig. Es si di
einzig Bilder wo ni dehei ufghänkt ha. U si hei sehr viu
mit mim Afang z'tue.**

Oenzberg3

Kurz stehen lassen



Nach däne doch rasante Bilder muess i jetz e Brügg
boue zumne neue Thema. Wo o viu mit Afang z'tüe het.

Das isch e Ufhängevorrichtig vore Hängebrügg in Bristol
s'Ängland.

E Hängebrügg wo dr Afang vo zwene Stadtteile
mitenang verbingt.

Brückenträger

Kurz stehen lassen



Clifton Suspension Bridge isch über 75m überem Fluss.

Es gwautigs Bouwärch wo scho mängs grosses Schiff ungerdüre isch.

Kurz stehen lassen



U das isch sones Schiff, wo mit Sicherheit unger däre
Bügg düre isch.
Es isch d'SS Great Britain.
Das Dampfschiff isch s'erschte Schiff us Ise wo mit
Propäueratrib u Dampf dr Ocean überquert het.
Somit dr Afang vore neue Dekade vor
Passagierschiffahrt zwüsche zwene Kontinänt.

SS Great Britain

Kurz stehen lassen



**Viu Lüt, wo a däne Maschte hei chönne ufe Luege
u es ihne viellech o chli schwindlig worde isch,
si sicher uf das Schiff wü si uf Amerika hei wöue,
mit der Hoffnig chönne e Neuafang s'starte, aus chönne
z'värgässe was ir aute Wäut isch gsi u - dass ir neue aus
besser wird.
Nach däne eher düstere Schiffsbilder u hoffniogsvoue
Gschichte, gömer no uf enes Schiff im Bärneroberland,
wo o mit Dampf atribe isch.**

MS Great-Britain

Kurz stehen lassen



Der Motorerum vom Dampfschiff Blüemlisalp. Hie wird d'Enegie vom Dampf ine mechanische umgestzt, so dass z'Schiff übere See cha fahre. I däm Moment aber steits.

MS-Blüemlisalp Motorenblock 1

Kurz stehen lassen



U hie isch si jetz i vouer Fahrt!

Das isch würklech es Foto, ohni Photoshop.

**Mi gseht Dräibewegig vom Atrib u sogar das was hinger
em ne massive Staublock isch.**

**Das Schiff hautet o im Winter z'Merlige am Thunersee.
Da stige mir us um mit ere neue Gschicht azfa.**

MS-Blüemlisalp Motorenblock 2

Kurz stehen lassen



Der Hafe z'Merlige im Winter.

**U weme da grad Luscht überchunt mit Ross u Schlitte dür
d'Landschaft s,fahre isch sehr verständlich.**

**I ha euch zwar keini Ross, aber es Hundegspann wo ne Schlitte
zieht.**

**Bir nächste Sequänz isch wou d'Sunne gleitig unger gange!
Aber luegt säuber, was sich ar Hundeschlitte WM i Kanderstäg
zutreit het.**

Hafen Merligen

Kurz stehen lassen



**Am Afang gseht ja aus no guet us...
U zum Räschte muess i wou nid viu säge.**

Hundeschlittencrash

Kurz stehen lassen



Porträt Schlittenhunde

Kurz stehen lassen

**U zum Schluss vor där Wältmeisterschaft
es wunderschöns Bild,
wo aus wo isch gsi, cha versöhne
u wieder früschi Energie cha gäh zum Neu afa...**



**Hie faht Energie neu a.
Ar Küschte, am Afang zum Festland, stöh die
Windkraftwärk. Si wandle dr Wind i Strohm u d'Leitige
bringe dä dert häre wom ene brucht. Wär weiss, was
da dermit aus agfange wird.**

Energie

Kurz stehen lassen



**U o hie isch o viu Strom u Energie im Spiu.
Vo was isch das der Afang?**

**Die Tanne isch bi üsem Quartier.
Es isch dramatisch gsi, aus si vo schwarze Wouche
umrahmt worde isch.**

U das het drus chönne wärde:

Wetteranne

Kurz stehen lassen



Blitz über der Kirchgasse

Kurz stehen lassen

E Blitz über dr Kirchgasse in Derendingen.

Weme so wot, isch e Blitz es Highlight, wörtlich, höch em Himmu.

Zum Schluss wett i Euch no zwöi Bilder zeige, wo zu mine Highlights ghöre. Mir aber schwirig faut, se irgendwo i üsem Thema z'plaziere.



**Bevor mer zum Schlusspunkt vo mine Biuder chöme,
schliesse i e Chreis mit däm Bär**

**Z'Bärn im Bäregrabe im 2011. Eis vo de Junge bim Frässe
vomne Blackestängu.**

Luegt mau sini Taupe a.

**Weit Dir ihm zwüsche d'Chraue cho, genauso wi den dä
Eskimo?**

**Viellech chöit dir jetz däm Eskimo nachefüele im
Chanson vom Mani Matter.**

**Mis letzschte Biud isch mit emne wisse Vogu,
so schön wine Isbär. I bi mir sicher, dass dir so ne Vogu
wahrschinlech no nie heit gseh.**

**Är wird Euch sicher nid zwüsche d'Chraue näh, aber
hoffentlich zieht er Euch i si Bann.**

Bär

Kurz stehen lassen



Dä Albinospatz, e Genmutation, hei mir im 2013 i üsem Garte
gsichtet.

I ha däm drei Tag chüderlet, bis ne so im Biud ha gha.

Das isch es sehr beidruckendi Szene:

Dä Jungspatz mit däm speziue Chleid wird gfueret vo sim
äutere Brueder.

Im Kaländer hinger steit, es sig dr Vater. Ha denn no nid
gwüssst, dass bi de Spatze di äutere Gschwüster bir Ufzucht
häufe. Trotz där liebevoue Ufzucht vo däm behinderte
Jungspatz isch är nid aut worde.

Är isch wahrschinlech em ne Roubtier zwüsche d'Chraue cho.
Zwe Wuche speter hane nüme gseh....

So si mir em Schluss vo mine Bilder aglangt.

Genau a däm Momänt wo me cha ä Afang zrug luege. U das
chame bi Fotos im wörtleche Sinn.

Merci viu mau.

Albino - Spatz

Kurz stehen lassen